

## **MEMORANDUM O RAZUMIJEVANJU U VEZI SA SARADNJOM U OBLASTI IZBORA IZMEĐU CENTRALNE IZBORNE KOMISIJE BOSNE I HERCEGOVINE I STALNOG IZBORNOG TIJELA RUMUNIJE**

Centralna izborna komisija Bosne i Hercegovine i Stalno izborno tijelo Rumunije, dalje u tekstu "Učesnici";

Uzimajući u obzir njihov konstruktivan odnos razvijen u bilateralnom i multilateralnom kontekstu;

Potvrđujući njihovu podršku demokratskom procesu i poštivanju općepriznatih demokratskih standarda u pogledu prava i sloboda građana;

Nastojeći ojačati i produbiti bilateralnu saradnju u područjima izbornog upravljanja, kao i u razmjeni informacija i najboljih praksi o izbornim pitanjima;

Uzimajući u obzir njihovu zajedničku potrebu za razmjenom iskustava stečenih iz ranijih izbornih procesa, uz razmjenu stručnosti i stručnog znanja; i

Potvrđujući njihovu spremnost za uspostavu mehanizma saradnje u pogledu osmišljavanja izbornog procesa i provedbe poboljšanja naprijed navedenog procesa;

Dogovorile su sljedeće:

### **Stav 1.**

Učesnici će promovirati saradnju, uz obostrani dogovor, u sljedećim područjima:

- a. promoviranje razmjene znanja i iskustava u organizacijskom i tehničkom razvoju izbornog procesa, s naglaskom na razvijanje najbolje prakse u području izbornog menadžmenta;
- b. razmjena iskustava o novim metodama i pristupima koji se koriste u području finansiranja političkih stranaka i izbornih kampanja, te kontrole toka novca, računovodstva i korištenja sredstava za izbore;
- c. izrada i distribucija materijala o izbornim sistemima, ravnopravnosti spolova i inkluzivnosti izbornog procesa i postupka glasanja u svrhu otklanjanja prepreka u ostvarivanju biračkog prava građana, kao i u svrhu povećanja pravnog razumijevanja birača i drugih učesnika u izbornom procesu;
- d. jačanje saradnje u cilju povećanja povjerenja javnosti u izborni proces; i
- e. sva druga područja saradnje o kojima učesnici mogu zajednički odlučiti unutar svojih mandata.

### **Stav 2.**

Kako bi se razvio odgovarajući mehanizam za provedbu ovog Memoranduma o razumijevanju (MoU), učesnici će provoditi redovne konsultacije o sljedećem:

- a. utvrđivanje i revidiranje prioritetnih područja saradnje;
- b. izrada i podnošenje preporuka za područja saradnje, dogovaranje zajedničkih aktivnosti potrebnih za provedbu ovog Memoranduma o razumijevanju te utvrđivanje načina za njihovu provedbu.

### Stav 3.

Tokom provedbe ovog Memoranduma o razumijevanju učesnici mogu razvijati i zajednički odlučivati o zajedničkim planovima, definirajući posebne oblike saradnje. Finansiranje aktivnosti koje proizlaze iz ovog Memoranduma o razumijevanju odredit će se međusobnim pristankom učesnika.

### Stav 4.

1. Ovaj Memorandum o razumijevanju ne stvara pravne obaveze prema međunarodnom pravu.
2. Ovaj Memorandum o razumijevanju provodit će se u okviru odgovarajućih zakona i propisa dviju zemalja i ovisno o raspoloživosti dodijeljenih sredstava i osoblja Učesnika.

### Stav 5.

Ništa u ovom Memorandumu neće, na bilo koji način, spriječiti niti jednog Učesnika od zaključivanja bilateralnog dogovora sa tijelima za provođenje izbora ili međunarodnim organizacijama ili pristupanja međunarodnim izborim udruženjima.

### Stav 6.

Svaki spor između Učesnika koji se odnosi na tumačenje i primjenu ovog Memoranduma rješavat će se konsultacijama i/ili pregovorima između Učesnika.

### Stav 7.

Ovaj Memorandum o razumijevanju može se mijenjati uz obostranu pisanu saglasnost Učesnika, utvrđenu u obliku protokola koji će biti sastavni dio ovog Memoranduma o razumijevanju, a stupit će na snagu danom potpisivanja.

### Stav 8.

Ovaj Memorandum stupa na snagu danom potpisivanja i ostaje na snazi sve dok ga ne prekine bilo koja Strana nakon pisane obavijesti. Svaki od učesnika može iskazati svoju namjeru da prekine važenje ovog MoU dostavljanjem pisane obavijesti drugom Učesniku šest mjeseci prije prekida.

Potpisano u Sarajevu, dana, 15.5.2024. godine i u Bukureštu, dana, 04.04.2024. godine na bosanskom, hrvatskom, srpskom, rumunskom i engleskom jeziku, s tim da je svaki tekst identičan.

U slučaju različitih tumačenja, prednost ima tekst na engleskom jeziku.

**ZA CENTRALNU IZBORNU KOMISIJU  
BOSNE I HERCEGOVINE**

**ZA STALNO IZBORNO TIJELO  
RUMUNIJE**



gosp. Toni GREBLĂ  
Predsjednik

